

乾

隆

鄞

縣

志

鄞縣志卷十七

人物

國朝

范光文字潞公欽之曾孫順治六年進士授禮部主事主
陝西鄉試遷吏部文選司嘗值諸曹乏人兼署四司事剖
決精敏案無留牘初爲儀部時見同里董文和母妻子女
並沒入旗下行乞於途光文竭蹶貸金贖歸里人高其義
天一閣藏書甲於浙東光文復購所未備增儲之黃宗羲
至甬上光文導之登閣讀所未見書一時稱其不愧世家

風流云

續耆舊傳

黃象雍字薛侯性孝友再世同爨羣從數十人無間言登

鄞縣志

卷十七 人物

順治六年進士授行人典試廣東踰年請假歸時海氛未靖大師雲集率屯聚民舍編戶多遭殍逐者象雍以已宅讓戎帥而諷以戢士閭左稍安後遷禮部郎中致仕

曹志及續

者舊傳

范光遇字逢年少貧力學每五鼓起然燈讀書日則治生以養父順治五年舉於鄉次年成進士授膚施令地當兵燹之餘戶口多逃亡而丁賦極重責居者代輸光遇按籍申巡撫求奏蠲虛額得報可遷常州同知嘗攝宜興篆懲奸民之冒旗軍者其黨以飛語搆諸大帥幾得禍對簿事始白又嘗署郡事出冤獄四人陞知竟州府革私耗郵驛遞葺學宮甫八月以常州通賦降秩歸從子廷元子廷魁

廷元字掄三光遇同榜進士廷魁字介五順治十二年進士皆選庶吉士改檢討管侍班南海子廷魁班居後唱名世祖顧廷元曰汝弟耶廷元叩頭謝因

賜衣二襲廷魁早卒廷元歷遷至洗馬出爲江南參政督糧儲轉河南按察使晉廣東右布政使最敦內行事光遇如父所置田宅與從弟共之增先世祀產周三黨之貧者

邱志兼
采行狀

張翼字燕及順治九年進士授肥鄉令俗多盜翼均里徭嚴保甲盜爲衰止邑濱漳河久淤而決翼庀工築隄露宿水次且爲文禱於神一夕大風沙忽漲決口不築而塞民皆異之入爲刑部主事轉郎中丁內艱歸旋卒

邱子九英志

字梅先從黃宗義受經篤志於學夜分不倦年三十餘卒

續香
舊傳

戎上德字聿修少學於里中林時躍成順治九年進士殿
試後聞父病遽歸連丁內外艱服闋赴京授大理評事擢
戶部主事出權揚關先是權鬪者於支港遍置人役雖一
介行李亦不免橫征上德一切罷革事竣轉員外郎廷議
交推轉文選司郎中謝絕私謁苞苴無及門者廷議又推
之出巡長蘆釐政恤窳戶汰陋規商民感悅任滿復領選
事陞鴻臚少卿改光祿擢通政司右參議卒於官家止中
人產時躍爲詩悼之稱其處脂不潤云

碑志

胡文學字道南一字卜言少貧力學順治九年進士授真

定推官直隸不設臬司大小獄悉成其手嘗鞫廣平一案
冤繫者衆悉平反縱遣之後以事過曲陽忽數百輩趨車
前謝卽前所縱囚也井陘賊以左道伏誅獲僞牒廣有牽
引文學訊治得實毀其牒不行恒山巨盜高鼎出沒并代
間幾二十年文學力勸井陘道陳某招撫之事未集而陳
以他事落職文學復請於制府乞復陳職以終撫局制府
三上疏報可鼎卒受撫以最擢監察御史巡視兩淮鹽政
疏請革行兌緩征倒追商困蘇而課反裕出餘俸建安定
書院置山長以課生徒後以四品俸掌河南道推陞太僕
少卿行至濟上得疾乞假旋里文學篤於友誼李鄴嗣父
子被難莫敢過其門者獨請往省城探獄事方盛寒所衣

止一褐冒凍渡江而前人皆義之鄴嗣輯耆舊詩爲之開
雕餘姚邵孝子古倫其母被掠訪得其處無貲不能贖文
學素不相識聞卽解橐助之其詩得法於鄴嗣鄧漢儀亦
亟稱之子德邁字卓人中康熙十六年鄉試由中書歷官
河南道御史巡視南城一土豪慕某妻色假宿負逼奪之
治土豪罪還其妻而代償所負有殺人獄同官歷讞未能
決命德邁覆閱囚家夜舁重賄至却之論如律陞順天府
丞卒官其詩雋爽有父風所居野意園蕭疎明瑟極花竹
之勝

曹志

史大成字及超登順治十二年進士廷試擬第三

世祖章皇帝閱其對策改第一授修撰隨充日講官嘗講

周易稱

旨賜賚優渥其父思之繪已容以寄亦令大成繪已容寄父大成得書悲惻故事京僚六年俸滿始得假歸大成甫四年上疏曰臣父思子不見思見子之儀容呼子不來頻呼子之名字臣而忍此不可以爲人子亦何以爲人臣

世祖覽其奏情詞哀切特許之歸比歸父已卒康熙初服闋赴京累遷至禮部左侍郎同官有議裁孝子節婦廩給者大成曰君謂子自爲其父婦自爲其夫何預朝廷而廩給之然則爲子不孝爲婦不節亦何預朝廷而國法必嚴之也議者媿屈十五年知貢舉往時科場條例甚苛點畫小疵必舉以繩士大成但嚴內外之防一切寬其文法遂

制爲令尋以病足乞歸篤於友誼與周容戎駿聲善容容游大成適里居恤其家備至駿聲卒於京大成爲之殯盡禮年六十有四卒

賜祭葬弟大進貢生官縉雲教諭造士有方士林稱之

續

舊傳參
曹志

屠粹忠字純甫暑時讀書董氏壁間大書戊子戊戌二字後舉順治五年鄉試十五年成進士果如其年里中傳爲異事謁選得封邱知縣縣遭河患城垣廬舍傾圮前令率艤舟河干以蒞事粹忠至築土誅茅粗立官署復置草舍數十百間招流亡居之巡行城址出磚甃於沙土中充雉堞之用鳩工修築不兩月城垣如故在任十載以最陞禮

科給事中江南巡撫議題州縣外補粹忠疏言爵賞宜從
中出以議論不合乞終養歸後補兵科陞工科都給事中
康熙三十六年淮揚大水陳便民十要陞大理寺丞授奉
天府丞晉大理少卿超擢兵部侍郎

聖祖以粹忠老而矍鑠書修齡堂三字賜之晉本部尙書
卒官子孝義康熙二十六年舉人授龍川令兼攝海豐和

平歸善三邑俱有惠政

曹志

洪圖光字暉吉少與史大成齊名負才任誕時人方之屠
隆順治十五年登進士知程鄉縣時粵中尙未靖撫循疲

氓甚有惠政以註誤去官

續耆舊傳

張瑤芝字次英邦奇元孫順治八年副榜知靈寶縣勤於

吏治能以信惠化民為人操守高潔敦尚友誼晚歲吟咏

俊逸李鄴嗣以為有謝康樂之風

聞志參續
耆舊傳

周容字茂三性所弛不羈御史徐殿臣一見賞契由是知

名及殿臣避跡天童海寇掠之去容倉皇奔赴以身質之

殿臣得返而容代受刑梏足為之跛乘間竊歸乃縱橫於

詩古文詞尤工書法斂鋒銛於渾樸中時謂容之詩勝於

文書勝於詩

浙江采
集書錄

李鄴嗣初名文允後以字行桐之子年十二能詩十六侍

其父官嶺外通人張孟奇歎異之與為忘年交順治初桐

以海上事牽連被逮下杭州獄鄴嗣亦繫定海馬甌中友

人萬泰救之得免桐出獄尋卒鄴嗣一慟幾絕自此絕意

進取燕人梁以樟至鄴鄴嗣與萬泰徐鳳垣高斗權斗魁
從之賦詩倡和無虛日詩文高華曲折絕出流輩里中奉
爲宗主凡社集仿場屋糊名易書例請鄴嗣第其甲乙一
聯被賞遂增聲價晚年力任文獻之重輯甬上耆舊詩人
各有傳書成立諸人之位祭以少牢學者稱臬堂先生續

舊傳

李文純字一之父禔官四川提舉少侍父入蜀與同里戎
玠相唱酬時稱二妙亂後棄諸生手抄書幾至千卷老年

筆墨猶端勁玠字孟常諸生

續耆舊傳

余澁字霖雨明亡後棄舉業聞餘杭何羲兆餘姚呂仲憲
得漳浦黃氏之學欣然往叩之潛思力索盡究其奧奉母

甚謹與弟潘尤友愛潘出授徒以養潘日候寢門起居無一不適節者其母嘗曰淚也待我潘也食我平生不與人言學亦不輕著書或問之答曰子黃子學行冠絕一代故能以其所得提唱後進吾輩何所有但法其事親孝守身廉不負私淑二字足矣潘字鮫巽以貢生任宣平訓導續耆

舊傳

聞性道字天廼以諸生當貢太學辭不赴順治八年大兵平舟山張冑堂闔門殉節性道訪得其骸骨貯以三大甕一爲冑堂骨其二則男女別異之適冑堂部將汝應元亦至相與瘞諸茶山康熙十七年

詔舉博學宏詞巡道許宏勳將以性道應力辭其後縣令

汪源澤延修縣志縣之有志自性道始兄性善字與同亦

盛年棄諸生與性道偕隱而終續耆舊傳

沈士穎字哲先父延祉明荆門知州士穎少有才名明亡

後棄諸生放浪詩酒以表問故王起居為人所首下獄高

斗權兄弟營救得免林時躍撰詩集序

楊秉絃字祈收精於考索以著書為事所撰浙江水利考

尤詳覈年八十餘談故國事歷歷如在目前早喪子晚年

撰著多為火所焚自號天多老人續耆舊傳

紀歷祚字永吉父五倫為推官以清節著獨好聚書歷祚

盡讀之又借閱所未見書於古今禮樂制度郡國分合山

川夷險之學言之如貫珠明亡棄諸生作道人裝偶行衢

巷間見坊表門闕必指數其生前淑慝以語從行者

續者舊傳

包燮字惕三諸生工詩尤妙於琴能度曲嘗賦明月詞極

爲時所賞因以包明月呼之客遊京師無所遇歸里往往

絕爨彈琴賦詩泊如也

續者舊傳

萬斯選字公擇泰第五子也黃宗羲講經甬上斯選與弟

斯大斯同皆從之游嘗謂學者須語語驗之躬行方爲實

學於是切實體認知意爲心之存主非心之所發理卽在

氣中非理先氣後論者以爲叢山真血脉平日取朱子半

日靜坐半日讀書之說謂分別理欲於靜中親切但初學

正須猛自提醒使此心卓然久之自然純熟矣武林施相

和易樂善不設城府徐介耿介獨立嫉惡如讎皆與斯選

稱莫逆交晚年更涵養純粹造次雍容歸於自得年六十
六而卒宗義哭之慟謂甬上從游能續鼓山之傳者惟斯
選一人又謂生平心得發先儒未發者人多驚詫斯選獨
渙然冰釋今無可告語不啻陽明之悼徐愛也

曹志

萬斯大字充宗泰第六子自少謝絕場屋以窮經爲己任
取諸經及先儒註疏熟玩精思窮日夜忘寢食者累十餘
年久之融會貫通豁然有得尤精於春秋三禮其讀書大
指以爲非通諸經不能通一經非悟傳註之失則不能通
經非以經釋經則亦無由悟傳註之失於春秋則有專傳
論世屬辭比事原情定罪諸義例專傳者經無事實待傳
而明公穀左氏互有異同左氏親承所見事多詳覈當以

爲主論世者春秋二百四十二年世皆無道孔子但據事直書是非自別初未嘗以後起之匹夫責已往之天子屬辭比事者春秋一事必有本末異事亦有同形如衛人殺州吁衛人立晉此屬辭而見其爲一人也立晉則書衛人立王子朝則書尹氏此比事而見其有公私也原情定罪者如魯桓見殺於齊時莊公尙幼法無可施故書薨書喪至書葬一似賊之已討者迨莊公旣長則書如齊書如莒莊於是不得辭其忘讎之責於三禮則有論郊社論禘論祖宗論明堂泰壇論喪服諸發明論郊曰郊惟日至一禮祈穀不名郊論社曰太社在北郊主月王社在國中論禘曰禘與祫一事魯禘不追所自出論祖宗曰東周祖文而

宗武論泰壇明堂曰儀禮方明壇卽泰壇卽圜邱其宮方三百步上有明堂日至郊天卽於方明壇謂之方明郊天主日也季秋大享於明堂明堂圜邱同在三百步內非有兩地論喪服曰承重之妻皆從夫服又曰庶子爲其生母之黨服與適子爲其母黨服同皆自來先儒所未有輯春秋初已成書燬於火復輯絕筆於昭公臨歿猶惓惓季武子立後事不置其精且專如此卒年五十一斯大爲人剛毅有守不可屈撓生一子甫九齡而婦歿卽不再娶處朋友勸善規過不少假借或弗改則裂皆頓足若其人在湯火必欲出之遇不善則憤形於色嘗入陽明書院見張縉彥主投諸地舉足折之觀者辟易葬父友陸符六喪皆人

所難能者家庭孝友敦篤事事有古人風蓋非獨文學過

人也

曹志

萬斯備字允誠泰第七子刻意為詩亦工書法李鄴嗣集
甬上耆舊詩斯備搜訪之力為多鄴嗣嘗評其兄弟曰粹
然有得造次儒者吾不如萬五好古而信篤志不紛吾不
如萬六學通古今無所不辨吾不如萬八萬七雖為吾壻
其詩律之工吾且出其下

續耆舊傳

萬斯同字季野泰第八子讀書過目不忘八齡在客座中
背誦揚子法言如倒映年十四五徧讀父所藏書尤精經
史康熙五年甬上有五經之會羣疑一言立解尚書徐乾
學聞其名敦請編纂喪禮諸書十七年會舉博學鴻儒寧

紹道許宏勳薦固辭明年開明史館應監修大學士徐元
文聘至都欲薦入史局力辭乃以布衣從事元文罷繼之
者大學士張玉書陳廷敬尙書王鴻緒皆延之纂成明史
本紀列傳四百六十卷惟諸志未就而卒嘗與友人論史
曰史之難爲久矣非事信而言文其傳不顯李翱曾鞏所
譏魏晉以後賢奸事迹並暗昧而不明由無遷固之文是
也而在今則事之信尤難蓋俗之偷久矣好惡因心而毀
譽隨之一室之事言者三人而其傳各異矣況數百年之
久乎故言語可曲附而成事迹可鑿空而構其傳而播之
者未必皆直道之行也其聞而書之者未必有裁別之識
也非論其世知其人而具見其表裏則吾以爲信而人受

其枉者多矣吾少館於某氏其家有歷朝實錄吾默識暗誦未敢有一言一事之遺也長遊四方就故家長老求遺書考問往事及郡志邑乘雜家誌傳之文靡不網羅參伍而要以實錄爲指歸蓋實錄者直載其事與言而無可增飾者也因其世以考其事覈其言而平心察之則其人之本末可八九得矣然言之發或有所由事之端或有所起而其流或有所激則非他書所能具也凡實錄之難詳者吾以他書證之他書之誣且濫者吾以所得於實錄者裁之雖不敢具謂可信而是非之枉於人者蓋鮮矣昔人於宋史已病其繁蕪而吾所述將倍焉非不知簡之爲貴也吾恐後之人務博而不知所裁故先爲之極使知吾所

取者有可損而所不取者必非其事與言之真而不可益也斯同之在史館也月有講會聽者常數十百人或詢以史事則曰某事在某書某卷第幾葉第幾行如其言求之無一爽者性不喜仕進見人輒以讀書礪名節相劇切斯同學於黃宗羲從劉宗周人譜入手以聖賢爲可至以己心爲嚴師始於敦倫睦族而推之於仁民愛物人無賢不肖一以至誠待之汲引後進唯恐不及安溪李光地最慎許可嘗曰吾平生所見不過數子顧寧人萬季野闡百詩斯真可備石渠顧問之選者也

方苞撰墓表及續者舊傳

陳赤衷字夔獻諸生自以學問之道非場屋可究竟乃入天井山與名僧參究儒釋同異歸而求之六經康熙初集

里中同志執贄於餘姚黃宗羲創爲講經會搜故家經學之書討論得失發先儒所未發十年間五經次第畢講赤衷以貢入都

廷試崑山徐乾學一見投契以碩學待之由是公卿爭欲延致赤衷作貞女篇却之竟窮老卒於京邸其一時同人已任者有范光陽陳紫芝陳錫嘏鄭梁萬言仇兆鰲未仕者有萬斯選斯大斯同斯備董允瑄道權張士埏王之坪張汝翼張九英俱別有傳惟陳自舜同亮皓首窮經牛毛繭絲不遺餘力而錢漢臣魯恭張壁薦九林陳和仲寅衷高揆采宇亮黃且暘道暉陸鈺侯盞李錫袞開張有斯錫琨輩亦復被服六經質有其文三十年來父傳子師傳弟

後先相望遡叢山之學脈仰證人之成規皆赤衷爲之開其溝洫也故甬上語經學者必首推焉

曹志

邱承嗣字吉士貢生以善病絕意進取家中落然好客不倦所與往來多高人逸士時甬上有六才子之稱承嗣其一也廳事前有三古樹二松一栢高丈許盤互蒼鬱皆數百年物承嗣與弟珣設雞黍邀諸同人日哦其下族弟允玉字蘊生邑諸生七歲能文詩爲先達所傾倒最後有克新字吾鼎潛玩宋儒書詩賦亦清剛

曹志

又有方伊蒿者名

劬以字行亦以詩名

續者舊傳

陳士京字齊莫魯王時爲光祿寺卿從入闕遂畱閩中築鹿石山房於鼓浪嶼營生壙題曰逋菴之墓年六十五卒

魯王在南澳聞訃親爲文祭之少喜爲詩徐孚遠海上幾

社士京豫焉

續考
舊傳

沈光文字文開明末中副榜由工部郎中晉太僕少卿奉
差廣東監軍自潮州航海至金門順治八年總督李率泰
聞其名陰使以書幣招之不赴將入泉州舟過圍頭洋遇
颶風飄至臺灣鄭成功以客禮見不署其官及經嗣光文
以賦寓譔幾罹不測乃變服爲僧入山旋於日加瀾灣社
教讀以醫藥活人及臺灣平光文與總督姚啟聖有舊將
資遣回籍姚死竟不能歸諸羅令李麟光重其名時餽之
粟光文乃與諸寓公結詩社尋卒於諸羅葬於善化里東

保

臺灣志

張士埏字心友康熙三年進士將任司理值汰冗員改行人需次於家黃宗羲舉證人講社士埏預焉帖帖坐諸生下銳志實學手抄四部書幾等身歌詩超然簡遠兄士培字天因亦宗羲高弟士埏子二長錫璜字志呂與弟錫璉最友愛講學論文出入必偕垂老同爨中鄉舉再上春官不第卽止不赴平生自詩文外兼工畫然不肖輕作錫璉字豈羅醇厚和平詩文馴雅如其人續耆舊傳謝爲憲字恕齋于宣子也康熙二年舉人瀟灑自喜尤工畫甬上前輩畫者多師文衡山董文敏二家爲憲隨意潑墨或散漫數筆生意迥出詩亦不甚雕琢有自然之韻論者謂詩如其畫畫如其人喜延接後進晚年諸耆老凋喪

略盡總持羣雅者幾二十年兄爲霖字孝輔弟爲衡字孝

德皆有文里人有三珠樹之目

續者
舊傳

董允瑄字在中德僂之子善承父志兵後家徒壁立四方
遺老過甬上者必造德僂流連累日夜允瑄竭蹶供具如
承平時婦徐氏故侍御殿臣女裝資極豐腆悉斥以備滌
滌叔父德僂遭亂喪其所有德僂每食不能下咽允瑄料
理供饋同其有無一日同里張汝翼過之坐次偶言頃見
江上石首魚船已至徐聞之卽拔釵買魚須臾以半尾供
客汝翼徘徊不敢下箸允瑄問之曰吾母未嘗新耳徐使
人傳語曰適市二尾以一尾奉堂上半尾遺餽太夫人此
其餘也汝翼嘆息曰閨閣中乃能錫類如此允瑄從黃宗

義游宗義稱爲講社中眉目詩文皆絕人後舉康熙八年鄉試未幾卒弟允璘字吳仲亦從黃宗義游宗義以意爲心之所存非所發學者習考亭舊說多未喻允璘解之曰存固存而發亦存也又謂學當鞭逼近裏區區訓詁同亦可異亦可若專力於此乃口頭上見解非實學也詩文踔厲風發陳錫嘏以爲陳龍川之流

續考舊傳

范煒字赤霞爲人伉爽不喜有所附麗時黃宗義講學甬上邑士多從之獨不預同族光陽與陳錫嘏等治詩古文詞爲心聲社亦不預惟閉門讀史考據古今方略爲有用之學康熙初以策論取士煒仿古制科策滔滔千餘言遂聯舉鄉會試除南和知縣有斥生某素桀黠善持吏短長

煒下車訪得實其人方竄名胥吏中監納秋稅匿稅銀三十兩立捕鞫某挺立戟手曰吾賊未入已罪止擅開官封卽更進之從監守自盜例亦僅論徒四年而後且將觀公之政煒怒曰此亂民也刑故無小立杖斃之一日視囚有三人者久論決見煒稱寃覆按其事則其族人素漁色家富有司率庇之三人妻子被汙訟不得直反予杖忿而聚毆致死因條上其事得末減蓋刑一人宥三人而南和人並稱快適三藩變起大府立徵軍需民間洶洶煒單騎歷四鄉諭以小醜不日就殄惟當具芻菱糗糧爲勦寇用事平歸爾直民故信煒皆樂輸不日而事集及事定捐俸以償民民益謂令不欺在任數年以最當內擢有巨公重煒

才欲招致門下謝不答旋以內艱歸服闋補通城縣部議
遷中書已刷堂而巨公以前嫌沮之尋以他事落職歸有
小園日觴咏其中優游三十餘年卒從弟光曦字晨馭以
拔貢生授陝西麟遊知縣值歲歉倉無夙儲勸右姓捐助
多不應乃出已貲爲粥以食饑民豪右內愧各輸藏粟民
藉以活陞戶部主事歷員外郎中出知南雄府南雄多竈
戶率貧困終身不婚娶光曦擇窮民女爲之配各資助之
婚者四百餘人一時呼爲范父致仕歸卒年七十有九嘗
書座右曰吾仕宦五十餘年只肯喫虧三字盡之與煒操
尙不同並以吏治稱家狀

徐勅字道勇父家麟明戶部主事勅中康熙三年進士授

三原令值吳三桂作逆四川平涼皆叛應之秦中郡縣供
應驛騷勅區處井然大軍過單騎迎犒士馬皆飽騰而去
漢中乏餉制府擬令未完之賦皆改征米自輸送軍前計
米一石脚價且數倍而三原民欠尙三千金勅爲借墊報
完邑民獨免折色之苦再任廣東順德令朔望課諸生親
與評論士皆鼓勵會大比邑中獲雋者至二十四人嘗行
部見室多停柩野有暴骨飭保甲尅期令歸土無主者捐
俸置地葬之民頌其仁秩滿擢山西道御史未幾卒

曹志

袁時中字向若幼失怙恃撫於王母趙氏趙亡依其叔父
勵志問學然貧苦特甚五棺具在淺土侍御陳朝輔見而
憫之助以貲乃克葬著報恩編以識康熙六年登進士授

中書舍人與修實錄吳三桂反從征加禮部主事屯兵楚
中值暑濕士卒多病疫時中素曉醫術處方製藥雖廝養
卒必親診視軍中皆感涕是時調江南舵工以數萬計至
軍前久不用時中奏遣還皆踴躍而去一日赴急召山程
積雪劣容馬足忽墮峭壁下垂梯出之已折脅死矣適遇
蒙古醫人以奇方治之復蘇隨征七年始班師遷本部員
外晉郎中出爲貴州提學黔土經兵火後瘡痍未起又距
闈期僅數月時中疏請改歲爲科朝議允之行部甫畢感
瘴疾遂不起

黃宗義
撰墓志

左峴字襄南父應斗有學行以貢授平陽訓導辭不赴峴
中康熙九年進士知龍巖縣承辦軍需未嘗後期擢四川

威州知州請招遠方商人墾田俾為世業累官工部都水
 司郎中出為廣東提學試竣歸里性嗜學宋元經說手抄
 本至數十種嘗作玉壘山記謂威州與灌縣皆有是山蜀
 都賦及太平寰宇記以為在茂汶間者乃威州之玉壘若
 唐書地理志及杜詩所謂題書心亂者乃灌縣之玉壘其
 考索精核類此采曹志及蔣拭之所作墓志兄臣黃字紀雲康熙二十
 三年舉人雄於古文以餘力為詩亦蒼秀拔俗郡守李廷
 機修志嘗預參定晚授錢塘教諭續耆舊傳

黃斐字雲襄綬四世孫康熙九年成進士授庶吉士改御
 史疏劾廣平府沈某貪縱下督撫勘奏大吏慮并坐謂沈
 某前已乞休

聖祖覽奏大怒曰此見黃斐疏上特顛倒年月以圖掩飾耳遂以失察罪之四川布政使家人以貿易失盜誣指良民報失物甚多斐疏糾謂金珠羅列非下吏苞苴卽川民膏血且吏而商已罔利矣況又波累無辜乎隨奉

旨察議二疏出直聲震一時陞太常少卿轉左右通政歷

奉天府尹終副都御史子廷銘副貢生官戶部郎中

曹志

陸經正字復古世科之孫登康熙十二年進士授山東利津知縣同選者多貸金以壯行色經正曰異日必浚民膏以償欲爲廉吏不可得矣獨與兩蒼頭策蹇之任邑征額有陋規吏告以舊例可取厲色叱之凡催科有常期兼有定式及數而止無稍溢錙銖者民感之輸納如約不施鞭

朴而正供獨先諸邑訟者初投牒卽詰其情僞以單詞決之或須訊鞫兩造具備隨聽斷無久淹者邑士數十年無列賢書經正歲時集諸生於學宮贍給之爲講析文藝自是有登甲榜者任滿晉蘭州知州旋乞致仕歸

曹志

徐懋昭字晉公康熙三年進士知沛縣以文學飾吏治在縣凡六年妻子未嘗服紈綺舉博學鴻詞報罷遷開封同知平生與周容李文纘洪圖光唱和極多

洪程鄉集及續者舊傳

盧宜字公弼康熙五年舉於鄉授蕭山教諭毛檢討奇齡方困於諸生宜極力嘘拂之陞鎮遠知縣兵燹後遺黎無幾大吏令招湖廣民實之宜鎮撫新故皆有威德郵傳往來如織臺省符牒催呼斲午一切不以擾民以病乞休歸

杜門著述工書法兼擅繪事以墨蘭著

續者舊傳

謝于道字敏公于宣從弟康熙十二年成進士選庶吉士改刑部主事陞員外郎嚴獄吏需索之弊冬日製衣以給重囚裸體者遷戶部郎中出督雲南學政滇省洊經喪亂多失學于道脫略威儀相視如師弟子途次有擁輿問業者永昌衛官與諸生爲難行文審理知爲衛胥所陷遂申其狀於督撫禡衛官而白諸生寃滇士稱之

曹志

邱克承字紹衣成童時海寇入境從兵刃中負其祖母出逃人稱其孝康熙八年登賢書授義烏教諭校刻宗忠簡黃文獻王忠文集以惠學者陞鉅野知縣邑民置產多不歸戶里胥催科有遠步數百里者克承命就近著戶籍公

私便之舊時審丁止憑吏手得恣意爲奸克承逐保按籍
閱視得實夙弊遂清縣素多盜有曹州李姓者爲盜魁身
不出境而羣盜倚爲巢窟捕尉莫敢問乃於元旦出不意
擒之餘黨次第翦除隣境俱安堵邑多水患相視高下濬
其淤塞沮洳皆爲膏腴以卓異薦旋得疾卒鄭梁撰墓誌
兼采曹志
陳錫嘏字介眉幼入小學讀孟子至百里奚不諫輒作論
非之十五補博士弟子康熙十四年舉榜首明年登進士
第改庶吉士授編修十八年同考會試識拔多青年宿望

奉

命纂修皇輿表鑑古輯覽二書會請官員缺引

見獨命至前細詢履歷奏對良久舉朝咸屬目之以父文

奕年七十遂告假歸生平從事於格物致知之學嘗謂一事一物苟精神不到則此心危殆不能自安而氣稟羸弱自其爲諸生授徒餬口弟子旣衆惟恐一人失學窮日講授矻矻不休雖背僂而不恤又處身冰雪而三黨恩意友朋緩急不敢以力絀自解爲詞臣時公堂館穀私室橫經書筒客席屏當率至夜分病中猶隱几危坐不釋丹鉛士人持卷軸而來者必銖兩其得失終卷而後已竟以此致疾不能出戶年五十有四而卒

曹志

陳鴻績字子遜幼博涉經史於儒先理學之旨尤根極底與順治十四年魁於鄉授睢寧令清儉自持運河衝決估修費八千金鴻績身先工築止費金三百閱四十日旋復

底定河臣具疏褒獎康熙十八年舉博學鴻詞應試中選

授翰林院檢討

曹志

陳紫芝字非園性純篤事其兄金芝如父白首無間言從

黃宗羲講學中康熙十八年進士主考葉芳霽見其名喜

曰浙東名宿也薦入館選旋以親老歸省丁外艱服闋改

御史毅然以風紀自任時外吏餽遺京僚名爲書帕於科

道官尤重紫芝一切峻拒有奸徒鄧二者張酒食肆以妓

爲囹內私置囹圄誘良民入其室恣嚇詐或不遂所欲卽

囚禁之甚有潛斃者又以賄遍結當路人莫能詰紫芝巡

視南城遣役捕得一訊而服立置之法嘗上疏謂朝章國

典宜歸畫一民間冠婚喪祭尤未有定制請編纂禮書又

疏乞裁并屯衛大指謂屯衛始於前代今名存實亡而其籍掌於衛官有司不預知請以屯務屬州縣則錢糧可稽地畝可核逃盜可清所建白皆切於實用時封疆大吏多由閣部保舉湖廣巡撫張汧大學士明珠所私也恃勢不法臺垣無敢糾之者紫芝獨具疏參劾且請罪其保舉之人疏將上有大臣止之不可

聖祖已遙望見命上殿卽出疏因面啟其罪

上領之且曰滿朝爲所賄屬爾小御史乃爾敢言翊日面諭九卿保舉湖撫者一體嚴處陞奉天府丞請葺學宮墾荒土置學租設教習部議允其二陞大理丞讞獄慮囚屢

有平反未幾卒

浙江通志兼采蔡州府志郭秀傳

陳貞字吉人授江西上饒縣丞值閩變寇及廣信貞仇不
從逆奔南昌受平寇大將軍委知廣昌縣暫駐南豐賊衆
攻陷力屈被執囚於福州後絞於市事 聞贈江西按察

司僉事廕一子入國學

聞志

翁鳳翥任石門巡檢康熙十五年耿逆陷城殉難事 聞

贈經歷司經歷

西江志

王天才象協右營千總康熙十三年隨提督常進功與賊
戰於毛頭洋奮勇前進斬賊一十七級賊聚舟圍之自己
至申矢盡藥竭孤軍無援賊蜂擁入舟猶持短兵接戰力
竭墮海死事 聞錄其一子

曹志

朱旦字寶日故王家勤子家勤殉節旦亦捕入獄其門人

聞玠救之得免改姓名曰朱旦以貧故出遊關中值三藩
亂陝賊應之破府州撫臣用便宜授以兵克復州城敘功
授解州牧以爭鹽丁忤大吏去官復起知廣東之瓊州道
卒其詩風發泉湧尤工樂府古風多驚人語續耆舊傳

錢廉字穉廉啟忠第三子也少避地武林依外家改姓高
事定乃復姓稍長勵志讀書數學兵法無不究心耿精忠
之變總督李之芳招入幕府廉按壬遁術用火攻師遂大
捷敘功當授官以母老辭平生周卹三黨傾東脩所入以
給詩豪岸如其人子中盛字又起國子生喜考索掌故際

盛字在德諸生亦能詩

結埼亭集

李涵字敏公文純之孫夙負奇志不喜爲章句學值三藩

變起遂仗劍入閩以策干總戎設伏掩賊於江東橋上殲擒無算未幾總督姚啟聖攻賊澎湖涵坐戰艦乘風鼓浪直犁其穴臺灣平餘孽未靖大司馬王隲謂涵曰此輩烏合難可力勝必得儒將饒智略者非君不可涵受命密遣間諜誘其渠魁潛入內地不煩一矢就而擒之以功授漳浦遊擊邑多嘯聚爲盜涵於諸鄉各立一練總遇失事責有所歸自此盜皆屏跡旋攝海澄篆時平和方患土寇訛傳有數萬衆將薄城制府檄漳州八營兵往援涵聞之投袂起曰兵貴神速迅雷不及掩耳亦一奇也遽領帳下卒星夜抵平和界銜枚疾馳七十里鼓噪而進賊驚走縛其魁賴立等數十人餘悉縱遣爲良民適有以萬金請給信

符委緝餘盜立斥還之擢提標中軍參將改福州旋題督
標中軍副將遇艱哀毀遂病不起

曹志

子昌泉字復琦少便

弓馬雍正初中武舉喜填詞援筆立就嘗入京飯逆旅有
二孝廉方分韻賦詩見昌泉佩決拾衣短後衣意輕之不
爲起昌泉問所限韻立成二詩孝廉大驚揖請署姓名不
答卽上馬馳去其豪邁如此

采訪冊

仇兆鰲字滄柱爲諸生以抗直忤有司遭羅織久而始解
嘗授徒諸暨見士人有室家被掠者傾館穀贖之康熙二
十四年成進士

廷試策問官方及海禁兆鰲極言官方有保舉徇庇之弊
開海宜捐利以與民讀卷官楊雍建大稱賞之選庶吉士

預修一統志乞假歸邑令議以丁糧併入田稅邀紳士公議兆鰲言楊炎兩稅已合租庸爲一後世又加口率之賦今又併丁於田後來得無別增力役以病民乎是時無田之民利於更法羣聚兆鰲宅毀其外墻而持議不少變聖祖南巡屢蒙顧問踰年乃入都供職遷贊善轉侍讀特擢內閣學士改吏部侍郎時李光地陳廷敬張玉書皆在內閣相與講貫益以理學自任奉使昌平祭前代陵寢還奏請除昌平羊皮解費銀二千兩報可有請以武昌稅務併荆關監督者

詔廷臣集議兆鰲言其非便江南總督噶禮劾知府陳鵬年罪甚重士民走京師愬寃者數萬朝臣莫敢出一語兆

鰲獨言其無罪因得敘復以足疾乞致仕歸五十一年入都恭祝

聖壽

召見問以地方所聞見對曰去年江督噶禮免官張伯行畱任江南士庶歡騰臣不勝大慶其質直如此少從黃宗羲論學後歸宗於朱子然著四書講義仍兼采舊聞平湖陸隴其貽書謂念臺之言不當葺入兆鰲答書言學行如劉公而猶以偏見廢之乎晚年好養生家言注參同契行

世年
譜

范光陽字國雯大捷之孫十歲操筆爲文有奇語黃宗羲稱其文能力去陳言康熙二十七年舉會試第一授庶吉

士散館改戶部主事有巨商請補行前湖南兵亂時未銷鹽引下部議光陽爭之以爲兩淮鹽引久滯若更補行舊引商必重困事得止歷兵部郎中參將艾某應陞或以私憾抑之光陽持不可參將來謝拒不見曰吾所執國法耳苟市德與挾嫌何異踰年出知延平府閩民以洊饑行劫捕繫百餘人縣令自詡獲盜功張皇其事總督檄令治其獄光陽擬杖斃爲首一人餘縱遣之總督改令巡道覆讞將盡置之死光陽復詣省力言其無死法卒從未減郡故有延平四賢祠捐俸葺之在位七年禁革火耗罷一切無名之征嘗大書廳事曰淡泊明志平易近民郡人以爲實錄感疾乞休歸士民送者踰境不止其族祖大護於前明

曾任延平有惠政因立祠合祀焉自言文體凡三變少時
驅策六朝爲應世之文壯時考辨典故爲用世之文及從
梨洲先生游始知撥華存實然學人自期有在不徒語言
文字間則所造可知矣子廷諤字質夫少從其父於講經
之會顧獨好讀史凡兵刑錢貨古今沿革之故皆悉心討
究黃宗羲稱之曰此通今之學也納粟得福建泰寧令精
習吏事民有投牒者立與決庭無畱訟獄無滯囚泰寧有
畫網巾先生墓故義士謝韓所葬也地窪濕爲改葬城東
且立碣焉

鄭梁撰墓誌
及續耆舊傳

王之坪字文三鴻業之子與兄之坊並受業黃宗羲之門
爲人孤峭動止皆有度規友朋過必摘發其隱慝無所諱

脩脯所入卹及三黨而家常屢空同門萬斯選嘗曰文三性命精微之學少躬行實踐之力多以明經貢太學年六

十三卒

鄭梁撰墓誌

張汝翼字且復母葉氏少寡無子其姒生汝翼卽抱而撫之汝翼嘗自塾歸母問讀何書曰大學出一巨帙授之曰此吾嫁時外大父以贈爾父者啟視則真西山大學衍義也由是有志於聖賢之學黃宗羲之甬上遂請業焉講經之會諸人談辨鋒起徐以一言析之問者皆意慙宗羲每稱之曰張且復王文三皆篤行君子也

胡文學撰交稿序

萬言字貞一少以古文名黃宗羲極賞之季父斯同亦曰使我有汝筆班馬不難企也以副榜預修明史獨成崇禎

長編一書楊武陵孫挾要津札乞於督師傅少寬假有運
餉官以棄餉走死求入死事之列並力拒之以此得罪貴
人後以教習期滿知五河縣大吏文致之論死其子承勳
遍貸諸有力者得贖免從弟經字授一斯大之子少承家
學又嘗叩質於應撫謙聞若璩諸公聞見日富兼工隸書
康熙四十二年成進士入翰林改編修主山西鄉試預修
康熙字典督學貴州事竣奉

命修通州城賣產以應家靡剩遺晚年修寧波府志又續
輯其父禮記集解春秋明義二書杭城大火燼焉遂抱恨

而卒

采家傳及
續者舊傳

陳汝咸字莘學錫嘏子也少隨其父於講會中目無流視

耳無妄聽顧未嘗以道學自名康熙三十年成進士選庶吉士座主安溪李光地方以講學招來後進或邀之同往汝感謝不預散館改漳浦知縣俗好訟胥吏能以一訟破中人產汝咸下車著令凡戶婚田土先令親屬保甲議議成息訟於官其大者甫受詞卽面論訊期不遣役下鄉亦不少稽時日吏無所容其奸俗好服斷腸草以誣人嚴禁之捐金募民致草以絕其種民間酷信巫有病舁諸妖師狂走禱祝雖藥石亦卜之汝咸開示曉諭并自製藥以濟貧者巫風以息值編審上戶或數千畝下戶止數十畝舊例任糧長者計戶不計田上戶逸而下戶常勞又都鄙分保大小不均汝咸定三百畝爲率上戶分之下戶合之輪

當糧長保則限以二百家無少贏縮閩之丁口專據明時
戶籍有遷居百年而原籍丁糧未除者汝咸請令入籍二
十年以上收之遷籍二十年以上除之各縣皆以爲便鹽
課則革場差杜包納商民之困皆爲一蘇漳故有黃道周
誠明書院爲浮屠所據理而出之贍以田兼葺其遺書以
示學者同邑錢肅樂墓在古田縣黃蘗山爲修埏道而清
其界任漳浦更一紀尙未調會南靖多盜而汝咸在漳浦
令各鄉練鄉兵有賊黨數百伏邑之七里岡發鄉兵擊走
之復聚於丹竈山已而聚於平和山因誘其黨林大札令
擒賊魁曾睦以獻賊始解散又以計擒海中大盜徐容詳
鞠之則知海中凡有六頭目且因供詞併得勦撫機宜申

請招撫果降其四大吏奇其才遂調南靖縣漳民擁輿遮道不得前乃夜半微服去其治南靖如治漳浦招降歐山羣盜且大興境內河渠未幾擢刑部主事遷廣西道御史疏言臺灣事宜次陳命案條例宜加詳定已聞海賊燒汛船特具防海二疏大旨謂海疆防賊命商舟掛號以憑查驗其實賊出海止乘小舟及奪商舟則關防縣照已盡得之非掛號之所能查況商舟利走大洋風急帆駛賊舟不能攔劫今以掛號故不得不迂迴於礁嶼之間而賊船乘之是掛號反爲商舟之害也又言賊雖海中飄蕩經冬必返其居故在洋之劫掠宜責之巡哨將士而未下海之蹤跡宜責之本籍州縣誠能嚴行保甲何不可窮治之有疏

上

溫旨慰勞五十一年海賊陳尙義乞降卽徐容所供六頭目之一也前招撫時獨尙義不至因具劄謂當因其來而亟許之自請行且薦福建舉人蔡文與同往鐵山鳳城島招納陞辭

聖祖面諭近御之臣不可蹈險但令蔡文入海爾駐遼左以待蔡文果撫尙義并令集未來餘黨十餘年巨患悉平復命都御史趙申喬薦其能實心辦事擢通政司參議尋命使湖廣祭炎帝虞帝陵兼賚駐防將士湖南北谿峒深險施州九溪等尤崎嶇或請但遣人代給汝咸遍歷其地猺洞長出迎則宣布

國家威德以諭之事竣晉鴻臚卿再遷大理少卿會陝西甘屬報荒奉

命查勘入境見饑民載道卽不御酒肉山路仄則下馬步行嘗一日踰九嶺至平涼急發所貯粟賑之體素孱以勞瘁致病猶力疾不已至固原而卒訃聞

聖祖憫之蔭其子本醇入監讀書本醇亦謹飭能守其家

法全祖望撰墓碑及浙江通志孫熙綱字廷振少有文名由舉人考取

國子學正未補官卒採訪冊

蔣兆龍字御六四歲而孤鞠於外家甫就塾卽循循有規矩及長授徒會稽主人豪家也侍兒百輩出入交錯常正襟危坐從無流視侍兒竊歎曰真君子也康熙三十年成

進士初任雲南浪穹縣蠻獠雜選一以至誠撫之莫不帖然晉保安知州民有投訟牒者呼至閣前以情開諭絮語如家人訟者往往內愧復懷牒去吏役見其和易暮夜以金進求出人罪立予杖而贖之移治歸州陞刑部員外郎每逢訊期反覆詳審惟恐一人失當京師游手之徒爭爲部胥冀分苞苴之餘獨相戒勿事蔣郎中終歲典衣質衾僅給朝脯冬月惟一大布革裘夫人不能具複裙怡然也出知平涼府值西陲方用兵軍需旁午會大將軍過供應簡淡遂以買馬不稱被劾平涼民數萬叩制府乞畱不能得兩泣送之歸後猶責償馬價無以給籍產止破屋四楹身沒不能具棺聞者傷之初自歸州赴京便道旋里偶乘

肩輿出適有貲郎得罪於諸生諸生誤以為貲郎也環而擊之碎其簾亟下輿問故諸生惶恐踵門謝過笑曰彼自當擊諸君特誤耳何尤焉揖之升堂茶話而別其雅量復如此

全祖望撰墓表

張起宗字亢友康熙三十年進士知河內縣令民闢荒田數百頃濬濟河以資灌溉邑賴其利以剛簡與大吏忤請告歸起宗受詩法於李鄴嗣歸田後日與名流觴詠工書善畫尤多方外交羽人衲子得其詩畫輒為長價

續耆舊傳兼采

曹志

戎式宏字舍大上德之子康熙初拔貢生初任蕪縣縣值歲歉奉文蠲賑不足出已貲佐之按口均給病者設藥局

全活甚衆有營弁率健兒入境縱圍場蹂躪民田式宏遽奪所持令箭用印封識繳納帥府於是相戒不敢復犯遷江南旌德縣兼署績溪有逋賦數千積久未清而地瘠民貧雖敲朴不能應式宏惻然爲驚其先業償之丁外艱瀕行士民攀輿泣別服闋補福建安溪未幾卒子澄字心源康熙二十四年進士知四川德陽縣銳於有爲大吏知其能以全蜀丈量事委之澄素講勾股法所至親自履畝凡兵燹後開墾成熟者無隱漏久荒賠累者輒豁免之官民皆以爲便陞督捕司主事改職方卒

曹志

范正翰字載瞻光文從子康熙五年舉人初就秀水教諭尋陞泉州德化縣攝篆大田巡撫以其莅泉久咨及一方

利病遂條議十事以進檄下閩屬遵行之子從益以明經

為桂林通判從夔舉人

曹志

張之紀字公肅以太學生為東萊縣丞陞河陽令旋攝河

內以病告歸立義塾義田延師教族子弟三黨中乏嗣者

為贍田立祀修墓焉

曹志

謝允文字有聲監生由光祿寺典簿陞湖廣衡州府通判

捐俸置學田供廩餼攝郴州修周濂溪祠葺書院置田贍

之前任劉某遺孤貧甚不能歸資助之為之授室其好義

多類此

曹志

陳時臨字二成三藩之變總制周有德知其才辟置幕府

後隸巡撫楊雍建從征黔中議敘授湖南城步知縣部有

紅苗最難撫時臨多方安輯之丁外艱歸服因補河南汝陽縣邑經喪亂之餘田疇幾廢揚埠有支河久淤時臨疏濬復其舊民始得灌溉之利康熙三十四年河北大水戶口皆流亡時臨遽便宜開倉賑濟而後申上司上官嘉其膽弗責也河北盡食蘆鹽獨汝寧一郡食淮鹽蘆商欲并之時臨謂蘆鹽計口而授不問所需多寡以成額給之是厲民也吾不能爲河北盡革其害反徇商人意以害境內乎爭之力得止巡撫徐潮亟稱許謂宜久任在汝陽凡二十餘年始陞兵部主事以病乞歸初作令時俸入皆以給宗族親友之貧者既歸蕭然無有一日太守來通謁以無襲衣謝之太守適有所白逕登其廳事乃遣人四出假襲

衣久之始得見晚景益憔悴以卒

全祖望撰墓志

董雱字山雲父德巍以淳行稱三子雱其仲也長雫拔貢生授國子監學正季霖亦以拔貢由知縣擢工部主事雱以諸生入太學援例授房縣知縣房居萬山中亂後井竈蕭然有司招民墾種所墾係上中二等田而所報則下等之賦有司方事招徠弗詰也及是

詔令長吏募民開荒能盡地力者得書上考有司各踴躍從事而房縣無有郡守詰之對曰房之未墾者皆下等田而其籍之在藩司者則上等賦也將來所入且不償所出卑縣已戒耆老無妄動矣守曰居官傳舍耳但得書上考何慮後日爲勞終力持之其後報墾者多稊确小旱卽失

收賦不得蠲逃亡者比比而房民獨無事遷永昌同知移
萊州其屬邑歲遭大水爲濬河築隄水患遂絕擢永昌知
府時制府議開孟廼銀山雩爭之曰孟廼係土司若開山
必遣大衆遣大衆必陵蠻戶而金刀所在漢人與蠻戶必
有互相攘竊之事且成亂階制府以其阻議頗愠會六月
米價騰踊民多死者由永昌文移至會城往返需六旬乃
先發常平倉并借施甸之穀以給之而飛騎請擅行之罪
於制府果大怒遣人覈其數皆可稽無升斗私乃止以年
老致仕而孟廼之議亦止子宥字樂窩能擘窠書兼習繪
事宿字守素工隸書兄弟皆能詩相唱和

續耆舊傳
兼采曹志

王睽字禹瞻諸生遊夔州爲知州胡期恒客會

大兵征喇藏制府擇屬吏任饋運期恒薦睽因假州判銜
令督餉嘗昏黑失道念管子書老馬之知可用命縱銜勒
隨所之遂造大營至弱水軍不得渡倣古革囊渡水法以
濟時用四川雲南甘肅三路兵雲南甘肅兵先至而餉已
盡川帥不欲分給詭詞問司運者睽言餉見餘五萬退而
川帥咎睽睽曰今在絕域幸合衆力得破賊何患無餉否
則兩軍饑死川兵豈能獨支竟分給之及班師軍士多舍
衣裝以馬馱遺金睽力禁止道經雪山人多凍斃睽卒獨
無恙敘功授陝西漢陰知縣申請招湖廣人開墾水田官
給牛種不許因再請竟以牛種先給應募者城西紅石崖
當孔道極險仄以水田所得賦償牛種外募工墾平後罷

官歸

劉崇撰行狀
及征西日記

史在甲字姓忠大成從子也甫生而父沒八歲復喪其母以孤童力學補諸生年四十餘始中康熙五十二年進士臚傳時

聖祖詢知爲大成姪特選入庶常授編修出知山西汾州府郡有水道自平遙縣流注汾陽平遙民壅其上流資灌溉潦則洩之以汾陽爲壑在甲至相度高下均其蓄洩二邑皆被其澤有奸民蘇文通者利其從父貲招客飲於家殺之以誣從父有司以其富也引嫌莫敢理在甲訪得其實竟抵文通罪久之以廉慎爲

世宗所知特召見語侍臣曰此晉省第一清官擢淮揚道

未上改廣東鹽運使向時公費率派之商人在甲悉絕之
晉山西按察使旋陞通政司右通政命督理寧夏渠工疏
惠農昌潤二渠復開新渠建西河長隄築賀蘭山後定遠
營城事竣歷遷左副都御史禮部右侍郎以足疾致仕歸
卒年六十四初在甲舉賢書不能北上有齋夫助以金及
宦成旋里召齋夫與禮食而厚遺之人以爲長者狀家
邵基字學址父惓字真長以碩學爲里黨師屢躋場屋年
踰艾始舉鄉試未幾卒基幼承父指授康熙五十九年舉
鄉試第一次年成進士選入庶常授編修再改御史巡視

京西

世宗憲皇帝勵精圖治深惡臣下苞苴之習舊奉使者外

吏競有賂遺基性素介盡却不受回京襍被蕭然

上廉知之始有意大用改給事中侍直上書房遷鴻臚少卿通政參議改祭酒再遷副都御史出入禁廷小心謹畏屢膺

召對密有獻替不一語人雖妻子亦不知也於閣部大臣舍公事相見外未嘗有私謁擢吏部右侍郎主江南鄉試乾隆元年充會試總裁官尋主順天鄉試釐正文體所甄拔皆宿儒尋奉

命巡撫江蘇正身帥屬苞苴不入其門行部過無錫縣有司以惠山泉餉却之曰是卽飲貪泉之漸也吳俗汰侈疏請禁優伶之宜淫者未幾與河督議開毛城鋪不合遂并

與江督左嘗劾蘇州守白巖已下吏河督復請釋而用之意稍不自得旋得疾

詔遣太醫診視竟不起遺奏至京予祭葬如例初基爲侍

郎時

賜邸舍內城遷寓惟衣一籠書數篋及撫吳蔣吉士拭之過之見曝薨魚於庭曰此鄉味吾適遣人歸里因命致此其後

諭祭使者至門所居在隘巷不容肩輿則步以入矮屋不足設廣筵則畢事於簷霑之下使者太息而去子鐸字景夫乾隆元年進士以庶吉士改檢討早卒

述

全祖望撰神道碑兼采行

范廷謀字周路洪震之孫少從學於陳錫嘏屢試輒躋以
入貲選漳州通判時權關者多不遵成例廷謀申詳大府
請立石道左示商民定額俾官吏毋得橫征平和令某以
不愜輿情致激變時議加勦廷謀亟白制府請自往撫慰
民果帖然遷郴州知州有命案捕繫二十餘人迄不知正
犯爲誰乃禱於城隍祠齋宿三日卽於祠中集諸囚謂之
曰神已告我矣唱名次至一人神色惶遽詰之立吐實遂
盡釋餘人自是鄰郡有疑獄輒檄使訊治巡撫特疏保題
入都命督糧輸甘肅往還九閱月事竣候陞郎中
詔九卿舉堪任道府者廷謀預焉授臺灣知府臺灣一切
章程多用鄭氏故制其地多流寓而番民尤梗化因條八

事上大吏謂兇番宜勦荒地宜墾田賦宜均住籍宜定臺
城宜建築民番賦稅宜一士子宜取本籍澎湖宜添設同
知一員以稽查舟艦防姦究制府高其倬採其半奏行之
會屬吏以罪被籍御史誤取邑中平糶公項并沒入之廷
諫力與爭遂以狗庇被劾引

見而奏事得自超擢兩淮鹽運使時年已六十有八矣閱
三年以重聽屢就大吏乞休奉

旨責其諸事推諉令解任修築鎮江城隨至京口週城勘
閱燒壑鳩材未畢工卒

狀家

傅維祖字文孫父攀龍能詩維祖舉康熙五十年鄉試數
上春官不第就刑部學習期滿引

見授福建漳平縣在任九年居官好修舉廢墜漳平城久
圯申請大吏領帑承修費不敷則捐養廉濟之邑南龍江
有浮橋朽廢捐貲新之又慮山水驟漲當解纜分船以避
衝擊別造二舟以備渡由縣至州道由金溪潭舅姑嶺潭
深嶺峻逕不容足乃募工鑿石以便往來改廢祠爲菁城
書院俾邑士肄業舊有義塚葬已滿別買地於高明寺之
右表其四界立石記之調福鼎縣未及暮以老乞歸卒

龍巖
州誌

周定昌字淳伯康熙五十九年舉人爲人嚴毅重然諾少
問業於范光陽之門光陽守延平邀至署授其孫從律經
逾年將告歸作十別詩中有別鼠一章光陽讀之曰君豈

有所諷乎謝無有再三叩之曰齋中多鼠偶賦此然先生
清操凜然猶慮見疑於門下士願終保此意勿使見疑於
屬邑之民光陽謝曰良規也所著詩皆潘人瑞所選人瑞
字伯緯舉康熙五十年鄉試精於三禮全祖望少時讀衛
正叔集說嫌其繁欲刪取之人瑞曰吳草廬纂言卽據此
刪取者全未之信後貽萬經書曰近讀吳氏纂言見所錄
注疏皆衛氏節本乃知潘先生之言不虛也

采訪
事迹

董正國字次歐劍鏢之從子少從之學詩工古文諤諤自
喜不可一世尤精六書嘗補葺張氏復古編且爲之注晚
以明經貢太學年七十二卒其契友曰袁德峻字眉少舉

康熙五十九年鄉試亦能詩

采訪
事迹

陳士良字廷獻槐之曾孫少卓犖不屑章句之學爲交踔
厲風發皆直達所見學使馬裕課士以易天地定位一節
命題士良不取邵氏說詰之則舉古注疏及後儒之辨圖
學者以對裕怒置之下等士良笑曰昔轅固詆黃老幾有
司空城旦之謫吾不能以曲說亂經一諸生何有父疾數
年扶持未嘗離側暇則執卷就牀下讀父亦臥而聽之居
喪顏色稱其情友朋過之皆自斂不敢對之一笑全祖望撰墓版

柴梓廷字上林諸生少負才跌宕不甚從事於學陳士良
責之曰以君之才乃自棄爲始從之講求六經旁及史漢
及唐宋諸家下筆滔滔萬言慈溪鄭梁見其所作曰奇才

也古文犀利似秦淮海後改學陳止齋

采訪
事迹

萬承勲字開遠父言知五河縣坐罪論死是時陝西方開贖例承勲家素貧乃告急於諸父友狂走數千里號泣請貸各捐貲以贈陝中胥吏匿其三千金未上承勲方奉父還里門而陝撫移咨浙省捕承勲追所未上金承勲無以爲計將自承匿金罪幸代父死其友陳坊奮然挾之行望門求援崑山徐乾學素重言爲代輸其半諸父友復醵金輸其半乃得釋歸既歸而故業蕩然則授徒以養素工詩母憂其致病微有戚容爲廢吟者數載父母繼逝見父遺書必哭母所種樹值花時必哭里中稱爲萬孝子雍正五年舉賢良方正入京授直隸磁州牧以慈惠稱值河隄潰

水浸淫及城下日登城督民操畚鍤從事竟以勞悴感疾

暴卒

全祖望撰墓志

范從律字希聲光陽孫雍正十一年進士選入庶常

今上御極增上

歷聖尊謚掌院學士命分撰

孝端文皇后

孝莊文皇后尊謚冊文向例庶吉士不預撰文院長重其名特委焉散館以知縣用得山東商河縣縣凡六鄉二鄉悉鹹鹼不毛舊有官莊募民開墾後應募者皆逃徙而數百頃浮糧令四鄉均攤賠納卽力言於巡撫爲具題豁免值歲旱失收請賑得報可暑月親至被災地方稽戶口以

給之邑有奸民崔如蘭等結十虎社以刀筆毒善良廉得其最桀黠者重懲之境內素多盜有劉子純者爲之窩主乃擒置之獄并得其歷年分俵簿籍悉追給原主訟牒稍稀盜亦衰止乃立義塾召邑士親課之於署中置書屋三間有以文就質者卽延入與縱談芻縣士聞之亦競集會大計郡守以浮躁爲巡撫黃叔琳所劾去官而黃素稱商河令不置郡守疑從律擠之也訴於臬司臬司入其言凡案牘無不吹索加駁詰黃已內召謝事從律知不可久處以病告遂休致瀕行士民送至郊外有諸生劉有信邀宿其家生嘗被誣從律爲雪之者也旣歸菲衣藿食日與里中後輩論文賦詩以自適年七十餘卒

采年譜及黃崑岡集

張興宗字育堂以太學生考職就選例當得州佐

世宗不次用人引見以爲能發山東試用知縣適歲荒按察使唐綏祖委以查賑時同事者務主節省頗不能遍及饑民攀輿控訴綏祖怒興宗宛轉調停覈其果爲里甲所浮冒者汰之餘皆按戶口而增其數綏祖喜以爲能補吾過言於巡撫題授堂邑縣初至見糧額憑戶胥所造摘拏勾消皆出吏手因得舞弊絲毫增而爲釐釐稍增而爲分遂私收大戶所納而以民間之羨抵之興宗素精算學按畝會計知其數不合然簿籍已定姑取赤歷核實勾消歲終餘二百七十餘金則以代逃戶與有糧無地之賦次年令赤歷以毫而止歲終猶餘百五十餘金又次年令以忽

而止歲終不過十餘金命貯之庫以備公用嘗謂聽訟之失無論事之大小動經數月甚或數年抄詞有費出票有費挂牌聽質有費上堂又有費而尤可訝者謂之賞紙夫以票爲賞是導之需索也乃令凡呈詞准理者定在三日不論早晚立與問斷其後山左復饑大吏援以工代賑之法題開武城臨清夏津一帶運河興宗方攝臨清篆所轄役夫二千三百餘人共計估土方三萬三千七百有奇發帑銀二千七百兩歎曰以工代賑良法也但築城築隄可以土方計今開河道河身限二丈四尺初在平地一人竟日可得土一方受值裕如及七尺以上二人竟日僅得土一方至一丈五尺以上三人竟日尙不得土一方而值不

加增勢必逃亡乃首捐已貲次勸富民助工不足復暫那
庫項濟之僅而得集日則步行河干夜則握算發值遂以
積勞成疾事竣歸堂邑將以疾乞休同官有忌之者譖諸
上官因遭劾得

旨引見將用之直隸以足疾不能赴歸里卒

全祖望撰行狀

郭永麟字芥子雍正元年中鄉舉上公車不售遂不再赴
精湛理學貫穿先儒之言於古今詩文家皆能別白其源
流門戶一時學者多從之遊初史榮與之善榮以事陷縲
絏會婚期不得出永麟爲代坐囹圄者浹旬後榮以弓影
之疑而告絕所居僅隔湖水未嘗一通聞問有及其事者
永麟輒以他語亂之及永麟卒榮扶杖臨其喪撫棺長慟

而去蓋亦自悔也

全祖望撰墓志

門人李凱字圖凌雍正八年進

士紹興教授能詩尤工詞曲包旭章字曉文乾隆十七年

進士知南江縣甫九月卒旭章有四明志補數卷蓋就所

見者錄之雖無異聞亦能畱心里中掌故者也

采訪冊

蔣拭之字季眉四歲而孤家窶甚母陳孺人苦節自誓以

女紅給晨夕幼時自學舍歸見釜中餘一人食母語之曰

吾與汝殊食已竟此畱待汝者心計母必未食卽空腹赴

塾晚沃以湯分啜之年二十爲童子師始能具二脯研摩

經史學益進所作舉業文傳播海內康熙五十六年舉賢

書越二十年始成進士選入庶常散館歸班補外遂不復

仕少美丰姿隣婦挑以微言遽返走不復經其門乾隆元

年入都大學士朱軾枉車騎過邸舍以病辭後軾於闈中
得一卷曰此必蔣某文也拆名果然謁謝曰朱語之曰吾
以至公得子今相見兩無媿矣既左遷所親或咎之歎曰
吾猶老寡婦也使有破戒豈待垂暮始博一第哉查慎行
嘗見其詩稱之曰此白傅後身也何焯尤咨賞其古文子
四人其三子學鏡字用照乾隆十九年進士授江西龍南
知縣以佐直忤上官罷歸爲詩文筆不停綴皆粲然可觀
嘗與客奕或持卷請賦長歌立以俟奕者求罷不許但時
時見其額微蹙及局竟命展卷則詩四十韻已就矣見人
無欵曲遇要人矜體貌者必以氣陵之

全祖望撰墓
志及家狀

史榮字漢桓少喜讀註疏不肯唯阿先儒之說熟於十七

史尤精小學其詩初宗竟陵後變而爲山谷又變而爲玉川晚年則略似誠齋性狷狹與人少可工擘窠書及篆刻貴人踵門以求拒不答意所愜雖茶寮酒肆索筆揮灑或童子亦爲之雕印焉

全祖望撰墓誌

其同學有范核核兄梧及費

金珪皆能詩核字次看布衣破帽搓手而吟情狀癡絕梧

字素園詩略相似金珪字莪堂榮妹婿也

采訪冊

全祖望字紹衣元立六世孫四歲入塾即粗解章句十四

補縣學生窮周禮田賦之數積算累日夜遂病父友萬經

謂之曰子年尙少能徐通諸家疏解何患不了然其舅蔣

拭之亦謂之曰治經不止經生家言吾嘗親承何義門之

說矣如周易中象數緯候諸家皆分得其一支經生以爲

支離黜之實自文其陋耳三禮則當參以史傳然後知古
今異同及因時損益之故其餘文集說部一二獨得之語
轉爲說經家之所未及皆在所酌取吾老矣姑述所聞以
待子之深造自得由是益務廣覽是時陸氏南軒陳氏雲
在樓藏書尙未散徧讀之猶以爲未足復登范氏天一閣
搜閱其秘本年二十游武林復就趙氏小山堂借所未見
書督學王蘭生極賞之以選貢入成均入都謁侍郎方苞
與論喪禮苞大器重之舉順天鄉試閣學李紱見其所答
策親過其寓齋劇談竟日出曰此深寧東發以後一人也
李寓居宣武門南割其西偏使居之東偏則以居南昌萬
承蒼每日高春就紫藤軒下促席或論學或徵据經史蕙

湯麥飯互爲主賓絃笑曰此楊誠齋所謂三三徑也嘗謁
尙書楊名時楊稱其博雅卽遜謝曰以東萊止齋之學朱
子尙議之何敢言博名時曰但見及此則進矣會

詔舉博學宏詞尙書趙殿最以祖望名薦乾隆元年成進
士選庶吉士是年試詞科祖望以先入館例不預次年散
館歸進士班補外遂歸爲人負氣初爲諸生巡道孫詔甚
相器重然非延訪歲時不一通謁及卒始往哭極哀以申
知己之感其選貢入都中途資斧竭一族人在山東按察
幕往貸之設宴極豐問其故曰主人雅聞君名但修一刺
稱門下當厚相贈立辭去晚年兩廣總督延主端溪書院
將特疏薦之因語諸生曰是以說經爲媒也託疾辭歸生

平留意鄉邦文獻以李鄴嗣所葺甬上耆舊詩止於明萬
歷間乃廣爲蒐輯人各立傳別白品格不少假借又嘗輯
宋元儒學案以補餘姚黃氏之所未及性喜雌黃人物與
人多忤後作金峨山晚楊梅賦云惟漸底於和平尙予人
以可受蓋晚歲所造深矣卒年五十一學者稱謝山先生

年譜

袁德達字信吾乾隆七年進士試刑部主事尙書張照才
之予提牢時副都御史仲永檀以言事下獄病篤舊例大
臣坐繫有病以狀聞得出獄視疾德達援例白尙書永檀
故德達座主尙書謂之德達曰此刑部例也以例請是提
牢職非私仲罪當死亦可死於獄獨刑部不可死仲於

獄死仲於獄提牢壞刑部法刑部撓天子法某何人恐有
任其咎者尙書不應德達爭益力尙書大怒去而永檀竟
死於獄後爲直隸司定州有趙如勲者父和爲同姓趙宋
趙簡毆死宋賄簡獨承時如勲年十四其從兄欽錫訟宋
實兇首坐誣論徒宋詭免簡亦遇赦得釋如勲母每切齒
爲如勲言如勲俟母終就葬弟授室乃告於墓腰斧出伺
宋殺之自縛歸有司有司當如勲斬獄上德達駭之曰此
案題結已十五年以審明無干之人該犯畜謀狙殺口稱
報讎而趙宋同毆厯出自其已死之母之口無別證左承
審官不加察覈該總督亦遂依回奏當意謂但按本律擬
斬輕重適等不知造意殺人罪在不宥而爲父復讎情有

可原以不宥之罪傳可原之情使將來秋審倖邀矜恤是兇狡姦民得與天性激昂奮不顧身之子相冒何以昭懲勸若該犯情詞果真律有本條應從寬典舊案何妨改正其或舊案並不差謬該犯亦實無他端特因母言痛傷父命銜恨堪讎束身歸法處心良可哀閔亦不應與尋常謀殺一例問擬刑本教理共貫同條豈容遷就轉致乖疏此案誠僞未明難以定讞合再研究確鑿具題其後獄再上如勲得減戍德達在刑部能會通律意剔抉疑互吏不能欺每奏獄同官輒屬主稿故事郎官主稿者必議稿堂上與堂上官相可否謂之說堂以博能聲人所爭也德達雖主稿恒推同官使說堂或問何不自爲地德達曰死獄至

部十不一生我欲生之而專其功爭者必以殺爲功是彼之殺吾成之也今歸彼以功彼樂以生人爲功且助我吾之自爲計不亦善乎由是疑獄多所湔雪尋以父憂歸服闋補原官出知雲南永北府地在金沙江外民獠雜處貧瘠頑悍其俗無子子婿不立宗法奴婢之異主者相匹耦生男從父生女從母德達剴切諭以倫理立法禁之復於郡疏渠墾荒興學勸士俗以丕變有大吏索金不應遣人假他事至郡陰刺其過無所得還自治狀大吏慚服行薦之會德達丁內艱歸後就銓得廣西慶遠府未及赴卒於京師貧無以殮同年生相與經紀而歸其喪

鄒虎文撰傳及羅有高傳

後記

施江濤字來青家世以詩學傳大父兆麟父鎰並有集江濤少奇慧弱冠補諸生一病幾絕父憂之江濤愈而父卒遂抱痛終其身不一赴場屋性介不妄取予妻子冬月猶衣紵衣獨喜爲詩小樂府最工兄滄濤字東嶽乾隆七年進士紹興府學教授亦能詩

采訪事迹

陶泐字書田其婦翁李昌裔雅器泐每語以古今經濟之學中雍正十三年副榜考授州判分發江南署新陽縣丞巡撫莊有恭一見引重適淮河決命以查勘桃源阜寧贛榆三縣水災時居民露處隄上泐謀所以賑恤者甚備具稿將面呈巡撫聞巡撫在寶應棹小舟急回值風雨昏黑從人勸暫泊俟詰旦進發泐不可至決口舟隨流而下遂

覆溺死巡撫奏其事贈州同賜祭葬蔭一子入監

范從律撰行狀

李昌昱字復旦乾隆九年舉於鄉十六年浙東大饑有司委搢紳就富民勸捐昌昱與其友屠可堂遍走四鄉奔走勸導各輸粟如數有司議設粥廠昌昱言施粥之害有三壯者能就食老弱在百里外無由至廠或因之擁擠攫奪且將致斃害一施粥則胥吏得侵欺甚或雜以他物饑民食之適致死害二聚數萬衆於一處穢氣薰蒸必致癘疫害三不如分圖造籍計口給米戶給一單注口若干閱十日一給各就近處寺觀令里甲及富室主之有隱漏及減少者許赴訴富室倍捐里甲予杖則澤均而害可去有司從之全活無算十九年成進士授工部主事歷遷員外郎

郎中出知江西臨江府下車首廉得大猾何仰思廖永昌等治如法痛懲胥役之作姦者每謂邑令曰吾居鄉知此輩橫久矣諸君恃爲爪牙然使諸君播惡於衆者皆此輩也由是吏惴惴不敢肆郡學向苦卑隘卜地遷建別於其旁置講堂朔望集士子親課之新淦縣有沙湖苦水患瀕湖之民失耕者已數十年爲節縮公費且捐貲爲倡屬吏助之築隄凡數百丈民得安業性坦率不能承上官意凡十年不遷後屬邑有殺人取貨者牧牛兒從草間見之邑令方舉卓異匿不報昌昱廉得實捕殺人者至一訊而服大吏密諭使寢其事不可改令他郡守會審餓牧牛兒數日脅令改供及質牧牛兒供如初且訴受餓狀他郡守默

然而罷殺人者旋斃於獄乃以失入被劾去官歸里居脫
略威儀每敝衣紉履與親舊過從見者不知其故二千石
也卒年七十九

蔣學鏞
撰傳

屠可堂字斯壽性至孝父嘗以事被逮將受杖可堂挺身
詣官請代令怒其父子重杖四十可堂素孱弱及是血肉
狼籍扶出堂下觀者皆爲揮涕舉乾隆十七年鄉試考授
內廷教習期滿分發雲南署定遠縣及姚州知州丁外艱
歸服闋補大理府太和縣適有征蠻之師軍需絡繹隣治
蒙化府有合江驛在深山密箐中遇急遞時致誤大吏檄
可堂兼辦凡役夫例給錢三百而軍裝必藉馬輸送官馬
不足雇之民間其值與夫價等乃出私錢增其二公事始

得如期及撤兵題署白鹽井提舉鹽戶向苦采薪山巔懸崖削立運致甚艱煎熬常不及額可堂見山頂有泉乃鑿巖壁如溜漕狀運薪木順流而下民以爲便

家狀

黃繩先字正木乾隆二十二年成進士以知縣用分發江西歷知樂平浮梁二縣繩先善治獄巧發奇中大吏皆才之他邑有疑獄輒檄治潘村有乞丐路斃者驗之有毆傷痕其地居民皆潘姓而不得毆者主名乃令曰此人死有傷日後親屬控告必覆檢暫借潘氏祖祠貯棺而使幹吏潛伺之江右人多禁忌見輿尸入祠舉族大闕或私相詈曰某殺人奈何累舉族吏遽執之一訊而伏豐城人余上交者其弟耀文在浮梁被毆死歷訟不得直會

聖駕南巡上文至山左籲寃發本省訊治事閱二十年中
更守令督撫非一大吏慮前審官獲譴將坐以誣控繩先
曰定例驚

蹕者罪當軍事誣且反坐奈何使兄弟俱以不良死乎且
事在浮梁此寃不伸令當任咎遂力請治竟白其寃上文
得未減其聽斷多類此在樂平有前明令張彥芳於靖難
時闔門投井死卽井爲墳前有清白堂繩先加修葺作粟
主以祀且立碑表之在浮梁修昌江書院城南有社學田
久爲僧徒所據繩先詣其地得斷碑遂以田歸書院爲膏
火資以積勞得疾乞歸未幾卒

家狀

葛繩先字誥宗父懋哉精易說繩先少承其家傳復從董

正國遊詩初學劍南後改學梅都官全祖望嘗稱其有天

然之韻家素腴後中落索逋者盈其門猶苦吟不輟

采訪
事迹

盧鎬字配京少從諸生楊爾音遊以漁獵庾詞癖事爲奇

久之棄去請益於史榮榮導以經史之學全祖望自京師

歸復就正焉祖望家多古籍每歲客遊假大江南北藏書

家鈔本摺載至數百冊而返鎬與諸同學遞閱之互證所

得由是貫穿百氏乾隆十八年舉於鄉館閣諸人一見輒

引重入闈爭欲得之而卒不售謁選授平陽學教諭丁外

艱歸未幾得噎症時方修邑志猶日就局中主張條例檢

閱諸文獻書病革時其友蔣學鏞過視之氣倏愒猶搦帷

相對商酌舊志異同得失之處次日卒爲人靜穆寡言笑

詩文蘊藉如其人祖望門下士所許可不過五六人先鎬而沒者三人一爲范鵬字冲一年甫二十餘卒祖望深惜之以爲王逢原之流一爲張炳字効晦精毛氏詩一爲李立櫃字又泉最强記嘗借祖望讀史通表閱之經月卽還叩以書中事枚舉無一誤者以優行生貢太學讀書過勞得怔忡病其婦蔣再剖股以療卒不起

采訪事迹

段秀林字沛年陝西榆林人年十八從軍青海爲前鋒雍正五年挑選分發浙江教習隸嚴州協由千總遷象山協右營守備熟於海道凡外洋山嶼島嶼瞭如指掌累陞提標中軍參將提督武進陞深器重之會

詔舉堪勝總兵者卽以秀林名上遷金華協副將擢溫州

總兵官

賜戴花翎在鎮六載乾隆三十三年擢浙江提督三十八年調古北口提督扈從熱河

召見問爾年逾七十尙能射否對曰騎射武臣職也臣雖老尙能跨鞍彎弧爲將士先一日

上在宮門懸鵠命秀林射秀林一發中侯心

上甚喜賜服黃褂四十一年金川凱旋將軍至各官郊迎特諭免戎服佩刀又預紫光閣

賜宴秀林與總督周元理皆以年老許乘馬入洵異數也尋調湖廣提督巡察苗疆營伍感疾請回籍調理次年春卒年七十四秀林在浙最久在直隸日以無家可歸陳請

入籍於鄞遂為鄞人云述行

鄞縣志卷十七終